



Cun lis spalis che al à e la muse che al tire, ancje i cjans di vuardie e àn pôre di lui e par chest, lui al cjate lavôr subite come vuardian.

L'ultin puest a lu veve cjatât in tal deposit di Tarcint di une gnove dite di Udin.

Daspó di lui, e an zontât un contabil, parcé che cualchidun al scuén ben calculâ il salari dal vuardian, no?

Po par controlâ il lavôr dal contabil e dal vuardian e an zontât ancje un diretôr... E cussí a jerin in trê.

Lui al lavorave 12 oris in dì e siet dîs su siet. Lôr, forsit 2 oris par setemane, une ore par

omp cuant che lui, dôs voltis par setemane, al si fermave plui adore par lâ al club. Il diretôr al podeve ben dî ce che al voleve e il contabil contâ ce che i plaseve, ma lui, al club a nol mancjave.

Fuart come un cjaval, gnogno come un vidiel, ma gjentîl come un cjan batût, a son agns che al va al club di Aikido.

Cinc mêis indaûr, a lu vevin obleât a combati cuntri une gnove zovine. Lui i veve cjapât il braç, al veve misurât la canole cui voi e al veve dite che al veve pôre di jê. Ducj si jerin metûts a ridi parcé che la canole di jê a no jere plui spesse dal poleâr di lui ma par finî, chei dal club, a jerin rivâts a maridâju e, secont jê, a vevin vivût une conte di mil e une gnot fin la setemane passade cuant che, nissun nol sa parcé, lui, le à butade fûr di cjase.

Alore, i amîs dal club e an clamât so fradi.

Ce jerial sucedût?

Cun la crisi in cors, la dite di Udin e veve fat savê che a scuignive riduzi il personâl e cui vevial licenziât? Lui!

E lui al si jere metût a ridi come un mat. Lui, il Carnera, a nol coventave plui. Par custodî ce?

Tant che il contabil al conte e il diretôr al riconte ce covential a fâ un vuardian? Chest, propit lu faseve ridi, sì, parcé che cheste volte al veve une scuse par lâ a incjocâsi e cussî, come ogni sîs mêis, al jere partît di bar in bar, di tai in tai, e di gnot in gnot, fin cuant che so fradi a lu cjatarà cence bêçs e lu puartarà tal ospedâl par tornâ a metilu in pîts.

Al club a sperin dome che a no duri plui di doi mêis come la ultime volte.

Ma se al cole in sbornie, al vul dî che par bevi, al ven sù dut ce che al à in cjase e che al spint vie dut ce che al à in bande.

Le sô zovine femine, laureade in psicologjie e crodeve di jessi rivade a tignîlu fer, ma nancje lis sôs bielis canolis i vevin impedît di partî e se al é partît in sbornie ridint, cuissà cuant che al torne!

Puar Carnera, cuissà ce ridi!

**di Jaio Furlanâr**

**#58**